

冊府元龜

二十五之七


十



漢書門類			
三〇〇	一〇一	五三九	五三四
冊	架	函	號

內閣文庫			
三五九	三〇〇	五三九	五三四
函	冊	架	號

內閣文庫			
番號	漢	5345	
冊數	300 (10)		
函號	365	6	



冊府元龜

淺草文庫



淮南李嗣京叅閱

西極文翔鳳訂正

豫章黃國琦較釋

帝王部 二十五

符瑞第四

唐肅宗以天寶十五載七月卽位于靈武改元至德
是年九月三日帝降誕之辰有慶雲屬天白鶴飛舞
於上所居殿宇翱翔二十餘匝而去十一月辛未長
安雲氣如衣冠備具太史奏天下和平之象

二年七月朔方節度郭子儀奏寧朔縣界荒地廣十五里有黑禾穀出遍地每日側近百姓掃盡經宿還生前後可得五六千石其禾圓實味甘美臣以爲天啓興王瑞先百穀故漢稱雨粟周頌黍稷豈瑞禾自出家給人足蓋陛下富教安人務豐敦本光復社稷康濟黎元之應也臣不勝大慶八月乙未太史奏其日老人星見光潤明澤十二月癸亥帝受國璽太清宮晨有紫雲見從殿東南角稍至殿前

乾元元年四月甲寅帝親行享廟禮拜祭昊天上帝禮畢有景雲見於日之南自卯及辰久而方散有頃朔方告破賊已未懷州刺史王奇光奏河內縣王昇清種麥數畝皆一莖三穗丁卯太廟殿院北門內柱生芝草兩莖紫蓋七月庚寅朔方節度使郭子儀奏東京上陽西金華門外伏舍下見白鼠穴穿之得天子信寶一枚皆篆書背上雕刻青龍白虎朱雀玄武相盤以爲帝德廣運乾道降祥璿圖永昌坤維耀寶請宣示朝廷詔曰我國家卜代悠久歷數無疆明神降休靈貺斯格昌符兆發寶印呈祥皇帝之徽號旣彰天子之鴻名又信斯寶累聖致感上玄垂裕豈朕薄德所敢當仁鄉國之大臣獲斯嘉瑞光我盛禮何

慶如之

三年五月嵐州上言合河關黃河水四十里間清如井水經四日而變十一月景寅左金吾衛大將軍王晟奏明鳳門有慶雲自欄杆上起盤旋紛郁光彩明耀門官皆覩焉

上元二年七月甲辰延英殿御座生玉芝一莖三花御製玉靈芝詩三章八句八月戊辰夜老人星見其色黃明潤澤而大

元年建子月戊戌冬至有雲迎日日揚光司天監韓穎奏謹按春秋感精符南至有雲迎日年豐之象建

巳月壬子楚州刺史崔旰表獻定國寶玉十三枚一曰玄黃符如笏長八寸上圓下方近圓有孔黃玉也二曰玉鷄毛文悉備白玉也三曰穀璧白玉也徑可五六寸其文粟粒無雕鑄之迹四曰西王母白環二枚白玉也徑六七寸六曰如意寶珠形圓如鷄卵光如皎月七曰靺鞨大如巨粟赤如櫻桃八曰琅玕珠二枚長一寸六分十曰玉玦形如玉環四分缺一十一曰玉印大如半手斜長理如鹿形陷入印中以印物則鹿形著焉十二曰皇后採桑鈎長五六寸細如筋屈其末似金又似銀十三曰雷公石斧長四寸濶



二寸無孔細緻如青玉十三寶置于日中皆白氣連天旣表云楚州寺尼真如者恍惚上昇見天帝授以十三寶白中國有災宜以第二寶鎮之中書門下表賀詔曰太寶禎符時膺昌運皇天不秘紫府降靈敷上帝之耿光悟神祇之有鑒荷斯戩穀弘濟艱難冀與兆人同登壽域股肱奉上宗廟福予豈唯朕躬致此嘉瑞卿咸有德寅奉休徵將使發揮克諧輔弼所請宣示中外編入史冊者依乙丑詔元年宜改爲寶應元年其楚州刺史并出寶縣官及進寶官量與進改隨進寶官典儉等各量與一子官宣示中外宜

知朕意

代宗寶應元年四月己巳卽位其日有慶雲見初帝至飛龍廡座前有紫雲見雲中有三白鶴徊翔又有喜鵲鳴及將卽位仗衛宿設夜分雲霧四合不辨咫尺旣曉朝呼萬歲天地清朝非煙滿空黃氣抱日咸以爲聖感甲戌潞州獲赤雀獻之五月商州上言慶雲見七月己卯京兆府萬年縣獲三足烏獻之九月戊辰陝州上言黃河清是夜老人星見黃明潤澤司天少監瞿曇謨奏曰臣謹按春秋元命苞云老人星明則人主壽昌國多賢士常以秋分候於南郊所見

合秋分之氣當天地之中伏望編諸史冊宣示朝廷
從之甲午太州至陝州黃河清二百餘里澄澈見底
戊戌太州嘉禾生異畝同穎獻之出示百寮
廣德二年五月己酉河南府上言河陽縣界黃河清
踰月不變十一月鎮南副都護甯齡先言合浦縣海
內珠池自天寶元年以來官吏無政珠逃不見二十
年間闕於進奉今年二月十五日珠還舊浦臣按南
越志云國步清合浦珠生此實國家寶瑞其地元勅
封禁臣請採進許之

永泰元年七月甲寅有三白鹿一白兔見于禁苑觀

軍容使魚朝恩受命巡苑內屯田因獲之以獻朝恩
上言請付史館編諸簡策手詔答曰白鹿白兔王者
嘉瑞和平之應朕以寡德詎敢當焉卿及將士等務
切軍儲克勤農畝上玄眷祐爰獲禎符所請付史館
者依是月庚申京兆府上言鄂縣嘉禾生穗長一尺
餘穗上粒生重叠如連珠八月戊子司天臺上言老
人星見

二年六月丁未是夜月重輪八月己酉秋分老人星
見於景上黃潤明大十一月乾陵赤兔見獲而獻之
大曆二年三月丁巳河中府獲玄狐獻之出示百寮

八月庚子夜老人星見其色黃明而大十月己卯右羽林軍獲白雀獻之乙酉有醴泉出於京兆府之櫟陽飲者多愈痼疾己亥潞州長子縣嘉禾生而莖同穗十一月己巳長至司天奏曰日色清明祥風四起請付所司從之

三年正月晉州獲白雀獻之四月乾陵上仙觀三尊殿有兩雀銜柴及泥補葺殿之隙壞凡一十五處閏六月揚州上言和州歷陽縣有三鳥同巢七月汴州獲白雀獻之閩州新井縣連理瓜生九月宣州獲白鼠三獻之十月太原府上言五色雲見及嘉禾生

四年正月乙亥大雪平地盈尺百寮於宣政殿拜舞稱慶前年冬少雪故也三月潤州上元縣產芝草一莖四葉高七寸六月慶雲見於西郊

五年四月癸巳廣州越州竝言慶雲見丁未台州言慶雲見五月己巳石州上言五色雲見

六年七月己丑華州言甘露降道州上言五色雲見八月戊辰楚州上言芝草產于淮陰縣是夜老人星見其色黃明而大丁丑白兔見于太極殿之內廊獲之出示百寮九月丁酉沂州上言慶雲見十一月潭州上言長沙縣榮唐里樹下有瓜生同蒂連心永州

上言湘源縣芝草生同根三莖合成一蓋十二月癸酉婺州上言嘉禾生一莖九穗一莖十二穗
七年五月甲申亳州獲白雀六月丁亥蔡州言慶雲見是歲大稔
八年四月壬申潞州上言玄宗十九瑞閣有白鶴來翔五月丁丑鳳翔府上言天興縣嘉禾生一莖二穗
六月戊申梁州獲白雀二獻之庚辰廬州上言廬江縣紫芝草生一根兩莖一丈五尺又合肥縣棠梨樹上烏鵲同巢七月丙戌東都留守蔣澳上言太廟殿柱生芝草二莖太原府上言清源縣人韓景輝養冬

蠶成繭詔給復終身甲午蔡州獲白鵲一獻之婺州上言金華縣李樹連理乙未蓬萊池獲毛龜出示百寮戊戌內侍省獲白鼠一出示百寮壬寅神策軍上言金天門外水渠中獲綠毛元龜獻之八月壬戌太原獲白鳥一白鵲一獻之庚寅亳州獲白鹿一白野雞一獻之滑州言靈昌縣連理瓜生及瑞麥一莖三穗九月丁丑京兆府上言梨樹及林檎樹並連理戊寅桂州上言芝草生是夜老人星見辛巳華州上言嘉禾生十月丁未襄州言芝草生庚戌揚州上言芝草生丁卯鳳翔府獲白鼠獻之太原府上言嘉禾生

十一月鳳翔府上言天興縣禾生一莖三穗太原府
上言壽陽縣嘉禾生兩莖同穗閏十一月丁未申州
上言義陽縣芝草生乙丑衢州上言龍丘縣李樹上
產芝草五莖成都府上言甘露降是月景子澤州上
言嘉禾生是歲大有年

九年二月庚午鄭州上言李樹上生芝草一莖三月
癸卯亳州上言芝草生京兆府獲白鵲一獻之四月
庚戌汝州上言甘露降甲午隴州獲白鵲一獻之五
月丁巳隴州獲白鵲獻之京兆府上言瑞麥生九莖
同穎七月丁酉廬州獲白鼠二舒州獲白雀一並獻

之九月戊申晉州上言神仙縣慶唐觀栢葉松身樹
已枯再生十月巳巳申州上言芝草生辛卯鳳翔府
上言嘉禾生一莖兩穗十一月癸亥福州獲白鷺二
獻之十二月戊寅寧州上言嘉禾生衡州上言李樹
上芝草生莖連樹根丁亥婺州上言慶雲見
十年正月壬寅冀州上言嘉禾生五莖生合爲一莖
乙巳處州上言李樹連理二月壬申江陵府上言芝
草生壬午處州上言芝草生三月濠州上言芝草生
鳳翔府獲白雀一獻之五月蜀州上言唐興縣李樹
上芝草生三莖漢州上言李樹上芝草生一莖七月

癸酉絳州上言芝草生八月巳酉夜老人星見九月乙卯太原府上言嘉禾生

十一年九月庚辰夜老人星見

十二年正月乙丑渭北行營所獲赤雀二獻之壬申嘗州上言甘露降潔白凝滋味同飴蜜五月甲子成都府人郭遠因樵爨獲瑞禾一莖有文曰天下太平四字獻之以示百寮宰臣等奏賀曰頃者賊臣兇狡敢蔽聰明陛下以時發覺成就誅放與人更始在物維新浹辰之間果獲佳應至德之化光賁草木太平之時遂形文字伏望藏於秘閣宣付史館從之六月

癸未苑內獲白鼠一出示百寮九月戊午夜老人星見十月乙酉潭州上言慶雲見甲午陸州上言桐廬縣五色雲見十一月巳酉蔡州上言汝陽縣芝草生紫莖黃蓋辛亥京兆府上言甘露降於城內靖恭坊之南街柳樹味如飴蜜十二月河中府上言臨晉縣嘉禾生四莖二穗

德宗建中四年五月滑州濮州黃河清

興元元年八月宋亳觀察使奏亳州貞元縣大空寺僧院李樹植來十四年長一丈八尺今春枝上忽聳高六尺周回似蓋九尺餘又先天觀玄元皇帝太后

陵槐樹上有靈泉湧出六月忽有靈氣五色見於泉上

貞元元年十一月京兆府奏有人於長興坊得玉璽文曰天子信璽中書門下表賀請付所司制曰可三年閏五月陝虢觀察使李泌獻瑞麥一莖五穗七月京兆府獻嘉禾異本同穗八月淄青節度使李納獻毛龜詔示百寮十二月同州沙苑監上言白鹿見四年四月宗正寺獻毛龜七月右神策軍獻瑞瓜三蔓合爲一蒂而生三瓜九月許州奏嘉禾芝草生五年五月宋州奏大麥一莖九岐者約一百餘本

六年正月防州言樞連理八月甲寅老人星見是月京兆府河南府並奏嘉禾異本同穎潮州上言芝草生連理李樹

七年四月壬寅廣州言甘露降乙卯汴州獻白鳥五月許州獻白鳥八月同州言祥雲見

九年五月辛卯左神策監州行營節度使胡堅右神策監州行營節度使張昌皆表奏初城監州鹵中獲懷土又置烽堡水路迥遠卽時有兩廢鹽井悉生鹽事符聖德可謂天贊請宣付史館制曰可是月甲午鄆州言甘露降

十年五月連州言慶雲見

十一年二月同州獻五色鴈六月河陽華州並獻白
鳥八月潞州獻白鶴九月成都言甘露降十一月潭
州進赤鳥

十二年五月通州奏九樹甘露降六月京兆府進白
鼠朗州進白鳥七月丁酉東都留守進芝草甲辰滑
州進白雀九月徐州奏嘉禾生十二月甲子左神策
軍進白鵲丁亥許州進白麋

十三年八月汴州進嘉禾九月癸亥懷州進嘉禾甲
子幽州奏甘露降十月右神策軍進白雀十二月婺

州奏廳前松樹甘露降

十四年正月蔡州進瑞麥四月婺州奏甘露降閏五
月乙丑滑州奏黃河清戊辰汴州進白鳥九月丁未
朔中書門下奏賀峨嵋獲白鷄丁卯中書門下奏賀
苑中獲白鹿

十五年正月潞州進白鳥五月丁未延州進玄兔庚
寅韓潭進白鼠七月鳳翔府鷄足山慶雲見

十八年五月眉州上言醴泉出八月徐州獻嘉禾白
兔

二十一年七月陝州獻紫芝成都府獻嘉禾辛卯潞

州獻白雀

憲宗以永貞元年八月乙巳卽位是月庚戌荆南獻
毛龜二

元和二年正月詔以湖南所獻古鼎付有司初永州
百姓唐履昌于路側掘得古鼎重一百一十二斤異
之故上獻八月戊辰老人星見

七年十一月東川觀察使潘孟陽上言龍州武安川
畚田中嘉禾生有麟食之復生麟之來一鹿引之群
鹿隨焉光華不可正視使畫工就圖之并嘉禾一函
以獻

九年八月中書門下奏夏綏銀節度使今月八日因
取土修城于西北角近倉掘得釜大小共計二百五
十四並容六斛已下五斛以上俱無破損如新器物
者伏以人天所資粒食爲本錡釜之大火化是因今
大軍方興此物自出則知何時藏瘞蓋神誘其衷今
之彰呈豈天有所助聖作物感一何昭然望付史館
從之

穆宗長慶元年正月帝饗太廟禮畢出朱雀門中路
日抱珥五色宰臣蕭俛等率兩省供奉官稱賀於馬
前

三年四月同州言文宣王廟甘露降

文宗太和元年十一月河中觀察使薛平奏當管虞鄉縣王賢鄉有白虎入靈峯觀謹按孫氏瑞應圖白虎者義獸也名騶虞王者德至鳥獸澤洞幽冥則見謹畫圖進上勅付所司

三年十一月丁丑朔乙卯司天臺上言太陽當蝕不蝕宰臣率百官表賀

六年七月河陽東川並奏慶雲見八月廣州奏六月二日慶雲見

宣宗大中八年正月陝州黃河清

昭宗文德元年九月雲韶殿前穿井得甘泉以示百寮羣臣上表賀曰臣聞至德動天天乃垂甘露神功浹地地故出醴泉然猶兆自郊圻啓諸甸服未有因於改井得彼甘泉不離禁掖之中便是殿庭之側澄清若鏡汲引而固絕羸餅香美如飴濟利而終期勿藥况銀床萬所玉甃千門味不可以和太羹美不足以調其食若非皇帝陛下幽通井德明契天宮則何以革故從新致斯玄凱移鹹變苦降此休禎臣等幸偶盛時叨塵寵祿思與堯年野老鑿以興歌願同漢水丈人汲而成藥

哀帝天祐元年九月朱全忠進白兔一隻中書門下
表賀曰今日東頭承旨常郁至奉聖旨者質素光而
應候容潔朗以協時旣昭耀於明庭實昭彰於聖德
臣等覽晉中興書徵祥說曰白兔者月精也抱朴子
云兔壽千歲滿五百歲則色白顧野王云王者恩加
壽考則白兔見協太陰之瑞實表坤慈應千歲之祥
雅符乾德伏以皇帝陛下膺圖纂嗣壓紐騰休紹祖
宗之丕基示孝慈於衆彙敦禮耆老委任勳賢所以
致八孔之効靈應三秋而發皓來從月窟疊霜毳以
蒙茸獻自梁庭粲冰毫而皎潔足以增輝瑞牒歸羨

皇猷聞天遠自於元勳拭目共觀於多士豈比魯傳
趙郡獨歌如練之詞實同晉獲壽春又繼凝鈇之詠詔
曰上天眷祐靈魏効珍道旣協於坤慈祥乃彰於月
窟雪霜是比較晶可觀全忠道貫神明功高鼎鼐果
因嘉瑞歸善天庭俾頒示於有司冀流光於不朽再
三嘉翫歎注良深

二年八月河南府奏雒苑谷水屯百姓馬會穀地內
有嘉禾合穗謹隨表進者詔曰多稼如雲已稱大稔
異畝同穎益表殊祥張全義尹正邦畿從容廊廟動
必垂於惠化靜每著於燮調佐時之畧彌章阜俗之

風益顯爰昭玄貺可卜豐年訓農遐掩於衛文獻瑞
迥同於唐叔載觀禎異尤切歎嘉仍付史館
後唐莊宗同光元年十二月亳州太清宮道士奏聖
祖玄元皇帝殿前枯檜再生枝畫圖以進宣示百官
其表云按瀨鄉記此樹枯來莫知年代自高祖神堯
皇帝武德二年太上老君見於晉州羊角山語樵人
吉善行云爲報唐天子吾是爾遠祖亳州曲仁里是
吾降生之地有枯檜重榮唐祚永興高祖遂於羊角
山置興唐觀其地改爲神仙縣封羊角山爲龍角旣
至亳州果有枯檜樹復生枝蒼鬱後因安祿山僭號

之時萎悴及祿山殄滅玄宗翠華歸奏枝葉復榮今
年十月中又於其上再生一枝約長二尺聳身直上
迥出凌虛葉密枝繁獨異衆木勅當聖祖舊殿生枯
檜新枝應皇家再造之期顯大國中興之運同上林
仆柳祥旣協於漢宣比南頓嘉禾瑞更超於光武宣
標史冊以示寰瀛宜委本州太清宮副使嘗加簡察
兼令功德使差道士一人往彼告謝仍付史館編錄
三年正月西都留守張筠奏昭應縣華清宮道士張
冲虛狀四聖天尊院枯檜樹重生枝葉畫圖以進三
月唐州奏淮瀆廣閏王廟前有兩樹東西相去七尺

五寸其樹各出地亦七尺五寸兩樹相向連理五月
許州進納兩岐麥一科其月汴州進兩岐麥兗州奏
任城縣百姓大麥地內有兩岐三穗至四穗者八月
丙子夜平明壽星見十一月青州符習奏萊州卽墨
縣人鄉貢士李夢徵室內柱上生芝草兩岐畫圖而
進勅符習累居藩翰屢顯政能靜以臨人寬而得衆
撫裕已彰於惠愛輔時又致於休徵固得和氣潛蒸
靈芝遽產同九莖而表瑞比三秀以呈祥載閱奏陳
良深嘉歎

三年三月振武節度使維京內外蕃漢馬步使朱守

殷奏臣脩雒陽月波堤至立德坊南古岸得玉璽一
面上進伏以皇帝陛下明德動天聖靈御宇遂使千
年之瑞出於九地之間輝煥簡編光華帝道臣竊觀
異瑞益表太平勅玉以呈祥印惟示信况坊名立德
地近雒陽當鳳曆之再新與龜書而叶瑞獲茲至寶
得自忠臣所宜載在簡編垂爲盛美可送中書門下
宣示百官宰相豆盧革等驗其篆文曰皇帝行寶四
字圓方八寸厚二寸皆細交龍光瑩精妙莫知湮墜
之由也謹按自秦漢以來天子之璽六文曰皇帝之
璽皇帝信璽皇帝行璽天子之璽天子信璽天子行

璽至玄宗時惡神器以璽爲名改名國寶漢末董卓遷獻帝於長安燔燒雒陽宮表術將孫堅攻卓收復京城營于城南軍士見甄官井上有五色氣入懼不敢汲堅令浚井得漢傳國璽文曰受命于天既壽永昌方圓四寸細交五龍一角小缺王莽逼奪之時投地稍損議者意張讓劫帝出奔掌璽者投之甄井也自六璽之外有傳國璽卽謂此受命璽也起於秦相李斯爲之傳於高皇帝卽漢末甄井所得卽乘輿六寶之一也自隋末迄今喪亂弘多湮墜者耻而不言好事者落然無記吁哉守殷又於積善坊役所得古

文錢四百五十六一十六文得一元寶四百四十五文
順大元寶守殷進納勅凡窺奇異盡繫休明所獲錢
文式昭玄貺得一者佇歸於一統順天者式契于天
心道煥一時事光千載殊休繼出信史必書宜付史
館四月陝州柳溪樹連理五月陝州進白兔八月己
卯司天奏老人星見十月癸亥司天奏老人星見其
月密州諸城縣人徐霸送芝草兩莖嘉禾九穗刺史
李紹岳畫圖以進

明宗天成元年十月巴州進嘉禾合穗并圖十一月
密州獻芝草并圖宣示中書門下百寮稱賀

二年四月郢州進白鵲五月癸亥懷州進白雀乙丑
 滄州進白鵲六月巴州進兩岐麥其月交州進三足
 烏華州上言鄭縣羅文鄉百姓李存家有兩岐麥畫
 圖進上八月丁酉青州進芝草其月壬寅平明前壽
 星見于丙上

三年九月閬州上言度支巡官陳知禮家生芝草兩
 本畫圖以進是月宰臣王建立進玉盃壹隻上有傳
 家國寶萬歲盃字水運都將段洪趙實於臨河縣下
 得之

四年七月遂州夏魯奇進嘉禾一莖九穗勅旨三秀

靈芝標仙籍而罔資世務九莖嘉穀按地謀而實表
 豐年既呈殊異之祥雅叶治平之運宜付史館編記
 八月戊戌司天奏老人星見其色黃明

長豐元年七月宿州進白兔以銀籠盛之八月丁未
 司天奏老人星見黃明潤大在井十一度時帝御便
 殿對宰臣因問曰司天奏老人星見卿等見否馮道
 曰老人壽星也每歲秋分見為嘗其色黃明則表聖
 壽臣等雖不見星出則定矣

三年十月萊州卽墨縣人王友家生芝草一莖三枝
 其枝又分兩岐或三岐上漸闡成片而圓色紫其片



卽爲葉葉莖一色其表白高尺餘青州節度使進之
并圖上又出宮中舊獻芝草四株其色莖葉皆同而
枝葉多少爲異耳

末帝清泰三年六月洛州獻野繭二十斤

晉高祖天福五年五月宋州貢瑞麥兩岐八月萊州
芝草生

六年八月登州蓬萊縣民楊蔚家芝草生畫圖進之
七年四月甲寅朔避正殿不視朝司天前奏日蝕故
也是月百官守司太陽不虧上表稱賀

少帝天福八年有白鳥棲於作坊桐樹作坊使周務

勅上言令捕而進之

開武元年六月襄州獻白鵲

漢高天福十二年二月辛未卽位於晉陽乙酉陽曲
縣令崔握遣主簿呂光鄴進白兔壹隻帝覽而嘉之
識者曰殷有白狼周有白魚唐有白雀皆爲瑞况帝
以乙卯降生而有此兆得不爲大慶乎四月星官奏
有氣黃紫多龍鳳之狀块莽盤旋不離城上識者曰
天不能無雲而雨不能無氣而立今瑞氣如此劉氏
其大昌盛乎

隱帝乾祐二年四月潁州獻紫兔白兔皆緘之於櫝

出示羣臣六月潁州獻白鹿

三年五月澶州衛南縣民王綰田麥兩岐凡十二莖

二十四穗曹州乘氏縣民王豐麥一莖三穗

周太祖廣順二年四月徐州以兩岐麥二十本來獻

八月靈武獻嘉禾二銀盤

世宗顯德元年正月朔日後景色昏晦日月多暈及

帝卽位之日天氣晴朗中外肅然五月丁亥是夕月

重輪是月辛卯世宗親征河東午後慶雲見於西南

旣晡風雲雨雹起于東北

五年二月登州貢芝草三枝十月登州刺史劉福進

牟平縣畫到芝草圖一面十二月丁丑朔朗州上言

醴陵縣玉仙觀山門中舊有田二萬餘頃久爲山石

閉塞昨於七月十七日夜有暴雷霹開其路復通詔

褒之

六年正月唐州民於野田中得玉璽玉紐本部遣使

來上

册府元龜

册府元龜 帝王部

卷之二十五

册府元龜 符瑞四 卷之二十一

册府元龜

淮南李嗣京參閱

西極文翔鳳訂正

豫章黃國琦較釋

帝王部 二十六

感應 神助

感應

書曰惟德動天又曰至誠感神是知為善者降祥好謙者受福天人相與之際交感訢合如律之命呂雲之從龍未嘗斯須而不應也故古者賢聖之君莫不



通三統之要重萬靈之命思惟往古窮極至治兢兢業業罔敢暇豫德之盛也合於天地誠之至也通於幽明神以知來聰以知遠善行無迹有開必先則感而應之乃自然之理也乃若商湯桑林之禱大雨斯降漢武竹宮之祀神光屢燭宣帝建祖廟而白鶴集玄宗封泰山而勁風止策書所紀其流實繁斯皆清衷玄感靈貺昭答高明聽卑若嚮之應也董仲舒有言曰王者修五嘗之道故受天之祐而享鬼神之靈德施於方外延及群生也豈不趣與

殷湯時大旱七年殷史卜曰當以人禱湯曰必以人

禱吾請自當遂齋戒剪髮斷爪以已為牲禱於桑林之社果大雨

漢文帝十六年四月以郊見渭陽五帝廟燿火舉而祠若光輝然屬天焉

武帝元鼎四年親祀后土東幸汾陰男子公孫滂洋等見汾旁有光如絳帝遂立后土祠於汾陰睢上

五年十一月始郊拜太一祠上有光是夜有美光及晝黃氣上屬天太史令談祠官寬舒臣欽若等曰談司馬談也寬舒

姓關等曰神靈之休祐福兆祥宜因此地光域立泰時壇以明應明著美光及黃氣之祥帝嘗以正月上辛用事甘泉

圓丘使童男女七十人俱歌昏祠至明夜嘗有神光如流星止集於祠壇天子自竹宮而望拜以竹為宮天子居中

竹宮去壇三里百官侍祠者數百人皆肅然動心焉

元封元年正月親登崇高臣欽若等曰崇與嵩同御史乘屬在

廟旁吏卒咸聞呼萬歲者三四月癸卯登封泰山其

夜若有光晝有白雲起封中

二年夏有芝草生其泉殿房中天子為塞河與通天

若有光云為塞河及造通天臺而神光之應

四年三月祠后土詔曰朕躬祭后土地祇見光集於

靈壇一夜三燭幸下都宮殿上見光其赦汾陰夏陽

中都死罪已下

六年三月幸河東后土詔曰朕體首山昆田出珍物

或化為黃金昆田者山之下田也武帝祠首山故神為出珍物化為金祭后土神

光三燭其赦汾陰殊死已下

太初二年三月幸河東祠后土詔曰朕用事介山祭

后土皆有光應介山在河東皮氏縣東南其山周大十里高三十里其赦汾陰

安邑殊死已下

太始三年二月幸琅邪禮日成山祭日於成山也登之采浮

大海山稱萬歲

四年四月幸不其不其山名其音基因以為縣在東萊祠神人于交門



宮神人蓬萊仙人之屬也瑯瑯縣有交門宮武帝所造若有鄉坐拜者如有神人之景

象嚮坐而拜也神坐見且黑且白且大且小鄉坐三拜鄉讀曰嚮

宣帝本始二年六月尊孝武廟為世宗告祠廟日有

白鶴集後庭以立世宗廟告祠孝昭寢有鴈五色集

殿前西阿築世宗廟神光興于殿旁有鳥如白鶴前

赤後青神光又興于房中如燭狀廣川國世宗廟殿

上有鐘音房戶大開夜有光殿上盡明迺下詔赦天

下

神爵元年正月帝始幸甘泉郊見泰畤數有美祥三

月幸河東祠后土有神爵集詔曰朕飭躬齊精祈為

百姓東濟大河天氣清淨神魚舞河幸萬歲宮神爵

翔集其改元神爵

四年二月詔曰脩興泰一五帝后土之祠祈為百姓

蒙祉福鸞鳳萬舉蜚覽翔翔集止于旁萬舉猶言舉以萬數也蜚

覽言飛翔覽觀也齋戒之暮神光顯著薦鬯之夕神光交錯

鬯香酒所以祭神或降於天或登於地或從四方來集于壇

上帝嘉嚮海內承福其赦天下

五鳳三年三月行幸河東祠后土詔曰朕方躬齋戒

郊上帝祠后土神光竝見或興于谷燭耀齋宮十有

餘刻甘露降神爵集已詔有司告祠上帝宗廟

後漢明帝永平三年夏旱而大起北宮僕射鍾離意詣闕免冠上疏曰伏見陛下以天時小旱憂念元元降避正殿躬自克責而比日密雲遂無大潤豈政有未得應天心者耶昔成湯遭旱以六事自責曰政不節邪使人疾邪宮室崇邪女謁盛邪苞苴行邪讒夫呂邪切見北宮大作人失農時此所謂宮室崇也自古非苦宮室小狹但患人不安寧宜且罷止以應天心臣意以匹夫之才無有所能久食重祿擢備近臣比受厚賜喜懼相半不勝愚慙狂營罪當萬死帝策報詔曰湯引六事咎在一人其冠履勿謝比天降旱

密雲數會朕戚然慙懼思獲嘉應故分布禱請闕候風雲北祈明堂南設雩塲今又勅大匠止作諸宮減省不急庶消災譴詔因謝公卿百寮遂應時澍雨

以注萬物故曰澍雨

和帝永元六年七月京師旱幸雒陽寺

寺官舍也

錄囚徒

舉寃獄收雒陽令下獄抵罪司隸較尉河陽皆左降未及還宮而澍雨

皇太后紀云有囚實不殺人而被誣羸困與見鄧太后察視覽之即

收雒陽令下獄時帝幼太后臨朝

魏明帝太和元年初營文昭皇后宗廟掘地得玉璽方一寸九分其文曰天子羨思慈親明帝為之改容

以太牢告廟又嘗夢見后於是差次舅氏親疎高下敘用各有差賞賜累鉅萬後魏明元泰嘗四年八月帝嘗於白登廟將薦熟有神異焉太廟博士許鍾上言曰臣聞聖人能享帝孝子能饗親伏惟陛下孝誠之至通於神明近嘗於太祖廟有車騎聲從北門入殷殷輶輶震動門闕執事者無不肅慄斯乃國祚永隆之兆宜告天下使咸知聖德之深遠

太武太延元年三月不雨六月使有司遍請群神數月大雨是日有婦人持一玉印至路縣候孫家賣之孫家得印奇之求訪婦人莫知所在其文曰旱役平寇天師曰龍文紐書云此神中三字印也文成興安二年正月遣有司詣華嶽廟立碑數十人在山上聞虛中若有聲音聲中稱萬歲云和平五年四月帝以旱故減膳責躬是夜澍雨大降孝文泰和元年五月乙酉車駕祈雨於武州山俄而澍雨大洽

二年五月京師旱辰祈星天日月五星於北苑親自禮焉減膳避正殿祭之夕澍雨大洽三年五月丁巳帝祈雨於苑開陽門是日澍雨大洽

二十年七月戊寅帝以久旱成秩羣神自癸未不食至於乙酉是夜澍雨大洽帝以久旱不雨輟膳三日百寮詣闕引在中書省帝在崇虛樓遣舍人問曰朕知卿等至不獲相見卿何爲而來平南將軍王肅對曰伏惟陛下輟膳以經三日羣臣焦怖不敢自寧臣聞堯水湯旱自然之數須聖人以濟世不繇聖人以致災是以國儲九年以禦九年之變臣又聞至於八月不雨然後君不舉膳昨四郊之外已蒙滂澍惟京城之內微爲少澤蒸民未闕一食陛下輟膳三日臣庶惶惶無復情地帝遣舍人答曰昔堯水湯旱賴聖

人以濟民朕雖居羣黎之上道謝前王今日之旱無以救恤應待立秋尅躬自咎但此月十日已來炎熱焦酷人物同悴而連雲數日高風蕭條雖不食數朝猶自無感朕心未至所致也肅曰臣聞聖人與凡同者五嘗異者神明昔姑射之神不食五穀臣嘗謂矯今見陛下始知其驗且陛下自輟膳以來若天全無應臣亦謂上天無知陛下無感一昨之前外有滂澤此有密雲臣卽謂上天有知陛下有感矣帝遣舍人答曰昨內外貴戚咸云四郊有雨朕恐此輩皆勉爲之辭三復之慎必欲使信而有徵此當遣人徃行若

果雨也便命大官欣然進膳豈可以近郊之內而慷慨要天乎若其無也朕之無感安用朕身以擾民庶朕志確然死而後已

宣武景明四年旱命尚書鞠京師見囚務盡聽察帝又減膳撤懸俄而澍雨大洽

孝明帝神龜二年二月詔曰農要之月時澤弗應嘉穀未納三麥枯悴德之無感歎懼兼懷可勅內外依舊雩祈率從祀典察獄理冤掩骼埋胔冀瀛之境往罹寇暴野死者既多白骨橫道可遣專令收埋賑窮恤寡救疾存老准訪前式務令周備三月甲辰澍雨

大洽

後周武帝保定三年五月甲子朔避正殿寢不受朝以旱故也甲戌乃雨

隋文帝開皇二年四月己酉早上親省囚徒其日大雨

唐高祖初爲唐王義寧二年三月不雨至四月乃命祈禱掩骼埋胔於是大雨

武德三年自夏不雨至於八月帝齋居稽顙四向拜遣治書侍御史孫伏伽告天地神曰某蒙聖明祐助得爲人主有何殃咎致使炕旱某若燕罪使三日內

雨某若有罪請殃其身無令兆民受茲饑饉應時大雨

四年三月帝以旱親錄囚徒俄而澍雨

太宗貞觀三年三月旱庚午大赦天下癸酉雨自是赦書所至其雨便降兆庶以爲異焉

六月終南等數縣蝗帝至苑中見蝗掇數枚而祝之日民以穀爲命而汝食之是害於百姓有過在予一人爾其有靈但當食我無害百姓將吞之侍臣恐致生疾遽諫止太宗曰所冀移災朕躬何疾之避遂吞之自是蝗不爲災

十二年正月帝朝於獻陵先是大雨雪及帝入陵院悲號哽咽百辟哀慟是時雪益甚寒風暴起有蒼雲出於山陵之上俄而流布天地晦冥至禮畢帝出自寢宮步過司馬北門泥行二百餘步於是風靜雪止雲氣歇滅天色開霽觀者竊議咸以爲孝感所致焉五月甲寅帝以旱避正殿自去冬不雨至是令文武官五品以上各上封事極言得失勿有所隱減膳罷役分遣使人賑恤寡乏理囚徒申冤屈司空長孫無忌以旱遜位不許自是澍雨應時歲大稔十七年六月大旱甲午避正殿減嘗膳丁未雨降百

寮奉賀請復嘗膳御正殿詔從之
二十三年三月自去冬亢旱至是始雨帝謂侍臣曰
天生蒸民樹之人君以牧養而移時不雨自天亢旱
粟麥不成春田未闢朕憂其窘罄無忘於懷將廩給
之故不令乏絕耳是日雨降
高宗永徽元年自夏不雨至七月詔在京諸司見禁
囚宜並慮過所司精加勘當速卽斷決尋而降雨
三年自去年九月不雨至於正月詔避正殿御東廊
以聽政仍令尚食減膳至二月壬寅大雨雪乙巳復
御兩儀殿南面視事

麟德元年五月丙寅以久旱遣使命禱名山大川避
正殿御帳殿丹霄門外聽政凡三日而澍雨

乾封二年春正月丁丑以時旱避殿親錄囚徒令所
司減膳其日雨降

玄宗先天二年三月甲戌帝以旱親往龍首池祈禱
有赤蛇自池而出雲霧四布應時澍雨

開元十三年十一月封禪帝登泰山至齋宮其夕陰
雲慘冽勁風四起裂幕折柱寒氣切骨帝露立祈請
仰天自誓曰某身有過請卽降罰萬人無福亦請某
爲當罪應時風止天地清晏日氣和煦及升壇休氣

四塞登高奏樂有祥風自南至絲竹之聲飄若天外及禪社首五色雲見日重輪

十四年六月丁未以久旱分命公卿祭山川巳卯河北道及太原澤潞等州皆雨祭地獄使李嵩上言曰臣至邢州雨降盈尺臣切問野老皆云往十二年春夏大旱六月下旬方始降雨其歲河朔大熟粟斗五錢今年得雨雖晚猶旱於前歲百姓欣然咸有秋望臣受命之日祈雨嘗山玉幣未陳明靈已應實陛下至誠玄感先天不違

十七年十一月十六日朝于昭陵掌事者彷彿遙覩

太宗立神殿前及玄宗入寢宮聞室中有聲咳又於寢宮門外設奠以祭陪陵功臣將相蕭瑀房玄齡等數十人如聞其舞蹈之聲

十九年四月巳丑侍中裴光庭中書令蕭嵩奏曰頃以春季夏初微誓時澤雖無溥潤尙未爲災臣等親承德音憂勤萬姓虔誠雲漢自結壇場有孚斯感不疾而速則有鶴鳥和鳴油雲杳起未崇朝而四溟飛灑不終夕而萬里滂沱生靈以之相慶草樹絲而自樂臣等幸參近侍親奉殊祥蹈躍之誠實百常品望宣付史館從之因詔曰政教不修則陰陽隔併精誠

有感則風雨順時頃自暮春爰涉初夏其澤未降農務是憂所以親結壇場用伸祈禱豈神聰意達而應不逾時斯實上玄昭鑒之深亦是卿等燮理之効宜加勉勵以答靈心開府儀同三司尚書右丞相宋璟等奏曰近者日永南陸雲密西郊鬱彼炎氣暫愆時雨陛下順天布德憂人在念潔壇菲膳恤獄緩刑故得膏澤應期會旬而至夜良田望歲自公而及私觀其洒液九重雜梅香而共溢含涼入水將麥氣而俱清臣等預睹休和叨承霑沐手詔曰頃自春涉夏雨未流施勤恤之心切憂農務是用寬刑宥過減膳撤

懸責已祈天躬親禱祠上玄垂鑒其澤應時嘉夏種之不愆佇秋成之有望爰與群公卿士同荷休徵各勉其誠敬承天德

五月壬申京師旱帝親禱興慶池是夜大雨乙亥侍中裴光庭等曰昨二十五日伏見高力士奉宣勅旨親於興慶池投龍祈雨伏以何言者天卑聽以平施惟微者聖玄感而降祥用能咸孚響臻幽贊昭應聖德美利其至矣哉頃西郊微愆南畝不害遠自河陝已聞沾洽近次咸秦頗未均被而聖情遷軫憂勞日晏降天步禱神池屑然膾饗若有從助俯祈萬福之

祐仰叩三靈之心言發而旋雲朝濟神通而其露降
 澍人欣華黍之盛物觀由典之樂不疾之速書契所
 未聞至誠之感皇王所不載霑休之慶曲成羣物况
 在臣等切倍嘗情望宣付史館式彰昭感之美手詔
 報曰爰自今春時雨愆序切憂農務無忘寢興陝維
 兩郊已聞流霽而咸京近縣尚未霑霈禾黍以疚
 懷仰雲漢而翹首投龍致祭親禱靈池誓移咎於薄
 躬庶垂祐於黎獻神道昭著鑒此虔誠其澤應期嘉
 生遂性亦是卿等同心燮理勩力謀猷上下咸和致
 茲休應豐年可望慶慰良深麟鳳飛翔未為瑞也

七月甲戌以久旱帝親禱於興慶池翼日大雨丙子
 少府監馮紹正奏曰自夏以來時稍微旱昨令臣畫
 龍刻魚聖躬親用祈禱先天不違油雲鬱興其澤滂
 降百穀豐就萬物滋成臣忝有司實荷殊慶請宣付
 史館以闡皇猷手詔報曰黍稷垂成實滋其澤既屬
 久旱懷憂匪寧思拯黎元靡神不禱靈心昭鑒降此
 休徵親垂穎之可觀佇大獲之為慶編之青史良有
 愧焉

二十四年六月以久旱命河南尹李適之祭嶽瀆祈
 雨是日澍雨適之奏賀曰聖心纔啓靈貺潛通膏澤

竝霑罔不滂霈請宣付史館仍於濟源縣虔脩賽禮
手詔報曰道貴以誠神無不應豈朕之先意亦卿之
用心川嶽効靈甘露竝洽請行賽禮深得事機宜宣
付史館用依來請
二十八年劍南節度使章仇兼瓊奏曰吐蕃以五月
十八日安戎城斷其水路至二十一日城東湧出一
泉將夜城南面又湧出一泉軍士飲之不竭侍中牛
仙客中書令林甫上表賀曰此城往緣無備權屬吐
蕃天威所臨復爲我有而犬戎自送其死且或執迷
率彼兇徒輒敢違逼城中在昔淮水爲虞雖佇之則

多而汲之路斷陛下每憂無物必期靈祐聖心有屬
神道玄通遂使拆石流泉分巖瀉液動天地而昭應
與造化而同功三軍所資一朝皆足旣使無渴乏之
慮益勵忠勇之心剪滅寇戎從此非遠傍稽典策博
考禎休以欣以躍實倍嘗品請宣示百寮編諸册簡
帝手詔報曰城之還我乃復其初天意神心自嘗幽
贊克濟軍旅湧出雙泉不假梅林有過疎勒編諸竹
帛任卿意焉

天寶四載七月蜀郡上言道士柳紫虛投龍設醮于
江潭有大蛇長一丈自潭遊出文彩五色有異嘗蛇

其上有慶雲紛郁望徧諸史冊從之
十四載三月丙戌勅頃緣少雨遍於致祭旋降甘澤
實荷靈祇其先令中使祭者別有昭報京兆府比來
應有所請處并畿內名山靈跡竝令府縣長官各申
賽祭
肅宗乾元二年正月籍田禮畢還大明宮自前年早
冬又無雪禮畢降雪盈尺
代宗廣德二年二月丁亥親拜南郊初上將饗太廟
齊之夕歲星爲太白同躔辟而不犯司天臺夏官正
徐承嗣上言曰木處仁君恩於養也金全義德體其

政也今月四日臣伺候屬輕濛隱映光跡暫明位指
東西不盈南北勢凌密切慮相干陛下展禮齋宮
陰騰又蔽星擬土錯不露其瑕及廟宿精誠天容若
鏡今太白避歲之審二尺有餘昔熒惑守心之明三
退無謬加以禋祀五帝敬告百神是憑法象呈休蒼
生致福偃兵歸馬不遠來期孝理行歌起于茲景事
殊古典應美前書望付史館兼示中外許之
永泰元年七月庚子以旱故禱諸神祠是日雨降盈
尺時京師米價騰貴斛至萬餘錢至是霈澤人心稍
安

德宗興元元年六月戊午帝發興元是日大雨將入斜谷路嶮峭多在巖石之間議者以為行至谷中若遇向之甚雨閣道壞絕進退何從咸切憂焉及入谷之後天象霽朗曾無纖雲以至京師無風雨之虞眾情欣欣皆謂聖德感通自天祐也

貞元六年四月以旱下詔免減稅戊午澍雨踰旬遠近霑足

十三年四月自春以來時雨未降正陽之月可行雩祀遂幸興慶宮龍潭為兆庶祈禱焉忽有白鷗驚沉浮水際羣類翼從其後左右侍衛者咸驚異之俄然

莫知所往方悟龍神之變化遂相率蹈舞稱慶至乙丑果大雨遠近滂沱

憲宗以永貞元年八月乙巳即位於宣政殿受冊先是順宗寢疾不能言王伾王叔文為學士居翰林通於內官李忠言宣下詔令韋執誼為宰相奉而行之天下危懼連月陰雨及定策雨遂止即位之日天氣清明臣下繇是知天命之有歸矣

元和二年正月辛卯有事於南郊將及大禮陰氣凝閉浹旬不開羣有司慮降雨雪以不克展禮為懼宰臣議請改日帝曰郊廟重事吾齋戒有日豈以將有

雨雪而廢乎泊三大禮方享獻之際皆景物澄霽及鑿與就次則降微雪大駕將動則又止焉翼日御樓宣赦纔畢陰雲復結瑞雪盈尺衆情懽悅咸以爲聖心昭感所致

八年二月辛未帝以久旱親祈雨於禁中是夜降霑霑足

十年正月下制討吳元濟自去年無雨雪至是討元濟詔下乃雨雪

文宗開成元年二月庚申帝幸龍首池觀內人賽雨自春少雨帝孜孜憂勤徧禮羣望至是其澤屢降中

外咸悅帝賦暮春喜雨詩百官咸有屬和

三年正月癸未以旱下詔放逋租及寬刑獄其日大雨

四年六月戊辰以久旱分命群官徧祠祈禱帝自卽位每歲有微旱卽虔誠祈禱至是久旱帝於紫宸殿對宰臣憂形於色宰臣以星官所奏天時當爾乞無過勞聖慮帝傑然改容曰朕爲天下主無德及人致此災旱今又謫見于上若三日不雨當退歸南內更選賢明以主天下宰臣嗚咽流涕各請罪乞免相位是夜澍雨大洽

後唐莊宗同光元年四月卽位於魏州時正月不雨至是人心憂恐洎宣赦之夕降雨彌溥耒耜滿野上下歡康稿苗復茂麥熟倍嘗

明宗初仕莊宗天祐十四年契丹圍周德威於幽州帝與李存審帥師同討自易州北山而行詰旦微雨諸將懼雨淋漓帝祝曰彼蒼垂祐國難終平敢希浹旬早得晴朗俄而開霽衆心咸悅

天成四年二月甲子車駕歸京宿於中牟縣百官詣行宮起居各賜酒食上謂侍臣曰麥田稍旱朕以暗禱祈乙丑屆鄭州雨三日百辟稱賀

長興元年二月甲寅赴南郊壇之齋宮是夜陰雲蔽密至二鼓微雨帝詔問司天官擇日奏曰聖德動天百靈斯會卽應便止至三鼓雨止星象精明瞻視如晝咸以爲盛德感也

末帝清泰元年七月詔曰昨以稍愆時雨慮損嘉禾朕親赴龍門遍申祈禱甘澤尋降豐稔可期宜令元差禱雨官各赴祠宇昭賽

漢高祖天福六年初爲太原節度使赴任晉陽大旱帝入境謂賓從及左右曰吾始衣繡還鄉甚有德色今一境大旱五稼將枯豈非薄德寡祐而致是邪帝

乃際地設脯醴望山川而禱曰某本生此地濫鎮北方朝廷差來不敢違旨在上者無德而祿其速身殃在下者以食爲天難加衆咎願興雲雨以救焦勞灑泣致拜其日大雨帝既下車入謁興安王昌寧公廟每致祈禱繇是境內大稔蓋精誠之所感也是歲天下飛蝗東距於海西至隴右南極湖湘北越燕薊川井廬舍無不填滿唯入太原山谷中者皆抱草木而死時天下蝗亦相繼而死焉但五稼已傷而太原獨豐人甚異焉

隱帝乾祐元年五月丙辰以久旱幸道宮佛寺禱雨

是日大澍

二年內出宋州所送蝗抱草死者以示羣臣乃命止捕焉差官祭之

周太祖以乾祐二年討李守真太祖決欲進攻十七日於西砦抽郭崇業仁魯及手下兵士與東砦軍進攻梯衝破弩百道齊發俄而西北黑風揚沙晦暝梯衝搖蕩人不能開目太祖令禱河伯祠曰吾奉辭伐罪以救黎元兇醜拒張勞兵攻伐神道禍淫合伸冥助風師無狀不祐王師明靈感通速宜止絕如無顯効祠其危乎莫訖而風止

世宗初節制澶淵凡三載或水旱不時有禱于神祠未嘗不應時而驗顯德四年親征淮南降下壽州還京四月戊午到潁上縣是日大雨先時帝在下蔡日宰臣以時雨稍憊上奏帝曰賊壘已平班師在近雨當不日矣至是果如聖語

神助

夫大人斯興神明鑒德至誠多感惠迪多助盼蠻幽贊顛沛靡失斯自天之孚祐也故有宅心清明發秀岐嶷越在側微之際已彰保定之徵及乎扶義臨戎勞神焦思顧謚靈命率籲衆謀將拯橫流以遏亂畧

繇是猛鷲効用靈祇告猶冒矢石而如夷視水火而可蹈寒暑爲之易節風雷爲之借勢休應震動蠢類薦祉况乃吉慶先啓聖知獨悟懇激之切至人事之符合者哉

黃帝有聖德初百神朝而使之應龍攻蚩尤戰虎豹熊羆四獸之力以女媧止淫雨

史記云皇帝教熊羆戰於阪泉之野

史記云皇帝教熊羆戰於阪泉之野

虞舜初居於媯汭其父瞽瞍嘗欲殺之使舜上塗廩瞽瞍從下縱火焚廩舜乃以兩笠自扞而下去得不死後瞽瞍又使舜穿井爲匿空旁出舜旣入深瞽瞍

與象共下土實井舜從匿空旁出去

舜以權謀自免亦大聖有神人之助也

夏禹初為司空觀於河有長人白面魚身出曰吾河精也呼禹曰文命治淫授禹河圖言治水之事乃退入于淵

漢高祖初為漢王二年四月與項羽大戰于彭城靈

壁東圍漢王三匝大風從西北起折木發屋揚沙石

晝晦晦暗也楚軍大亂而漢王得與數十騎趣去

八年冬帝東擊韓王信餘寇於東垣真定也還過趙趙

相貫高等陰謀欲殺帝帝欲宿心動問縣名何曰柏

人帝曰柏人者迫於人也去弗宿

宣帝初生數月遭巫蠱事收繫郡邸獄郡邸獄治天下郡國上計

計者巫蠱獄繫收繫者衆故寄此獄連歲不決後元二年望氣者言長

安獄中有天子氣武帝遣使者分條中都官獄中都官京

師諸官府也繫者輕重皆殺之內謁者令郭穰夜至郡邸

獄廷尉監所吉拒閉使者不納曰皇曾孫在他人亡

辜死者猶不可况親曾孫乎相守至天明不得入穰

還以聞因劾奏吉武帝亦悟曰天使之也因赦天下

郡邸獄繫者獨賴吉得生

後漢光武初為更始大司馬徇河北時王郎移檄購

光武光武趣駕南軒至饒陽晨夜兼行蒙犯霜雪天
時寒面皆破裂至虘沱河候吏還曰河水流漸無船
不可濟官屬大懼光武令王霸往視之霸恐驚眾欲
且前阻水還即詭曰水堅可渡官屬皆喜光武笑曰
候吏果妄語也遂前北至河河水亦合乃令霸護渡
堅護度也未畢數騎而水解光武謂霸曰安吾眾得濟免
者卿之力也霸謝曰此明公至德神靈之祐雖武王
白魚之應無以加此 今文尚書曰武王度孟津白魚躍入王舟光武謂官
屬曰王霸權以濟事殆天瑞也進至博城下乃惶惑
不知所之有白衣老父在道旁指曰努力信都郡為

長安守去此八十里 信都郡今冀州也光武即馳赴之信都

太守任光開門出迎

魏太祖之討張魯魯遣五官掾降帝衛橫山築陽平
城以拒王師不得進魯走巴中軍糧盡太祖將還西
曹掾東郡郭謙曰不可魯已降留使既未及衛雖不
同攜可攻縣軍深入以進必克退必不免太祖疑之
夜有野麋數千突壞衛營軍大驚夜高祚等誤與衛
眾遇祚等多鳴鼓角會眾衛懼以為大軍見掩遂降
晉宣帝為魏太傅勒兵從闕下趣武庫當曹爽門人
道車住爽妻劉怖出至聽事謂帳下守督曰公在外



今起兵如何督曰夫人勿憂乃上門樓引弩注箭欲發將孫謙在後牽止之曰天下事未可知如此者三帝遂得過去

文帝爲魏相國諸葛誕據壽春叛命築壘圍之初壽春每歲雨潦淮水溢嘗掩城邑故帝之築圍也誕笑曰是故不攻而自敗也及大軍之攻亢旱踰年城旣陷是日大雨壘皆毀

元帝爲左將軍從討成都王穎蕩陰之敗也叔父東安王繇以穎所害帝懼禍及將出奔其夜月正明而禁衛嚴警帝無繇得去甚窘迫有頃雲霧晦暝雷雨

暴至微者皆弛因得潛出穎先令諸關無得出貴人帝旣至河陽爲津吏所止從者宋典後來以鞭策馬而笑曰舍長官禁貴人汝亦被拘邪吏乃聽過至維陽迎太妃俱歸國

後魏孝文五歲受禪文明馮太后以帝聰聖後或不利於馮氏將謀廢帝乃於寒月單衣閉室絕食三日帝亦無恙

唐高祖初爲唐公大業十三年起義師於太原七月師次霍邑隋武牙郎將宋老生陳兵拒險義師不進屯兵於賈胡堡會霖雨積旬饋運不給高祖患之忽

有白衣老父詣軍門請見曰予霍山神遣語大唐皇帝若向霍邑當東南傍山取路八月雨止我當助爾破之高祖初晒之遣人東南視地果有微道高祖笑曰此神不欺趙襄子豈當負吾邪八月己卯雨果霽高祖大悅以太牢祭霍山
太宗初討宋金剛賊徒日感嘗欲覘敵潛軍遠抄騎皆四散太宗與一甲士登丘而睡俄然賊兵四面雲合不知覺也會有蛇逐鼠觸甲士之面甲士驚起因見賊至遽白太宗而俱上馬馳百餘步爲賊所及發大羽箭射之殪其驍將賊騎乃退當時以爲異焉

貞觀十九年征遼五月丙子師次臨遼頓其夕遼水減二尺三軍慶悅咸以爲得天之助

玄宗始三歲封楚王時則天因御高樓抱之眺望誤墜於地左右失聲奔下扶擁帝怡然無虧損之狀則天甚奇之

肅宗母楊太后方娠時玄宗爲太平公主所忌密謂侍讀張悅曰用事者不欲吾多息嗣恐禍及此婦人其如之何密令悅懷去胎藥而入太子於曲室躬自煮藥醺然似寢寢神人覆鼎旣寤如是者三太子異之告悅悅曰天命也無宜他慮及爲皇太子天寶十

四年安祿山反玄宗幸蜀留太子在後宣慰百姓賊師追至渭便橋已斷渭水初漲又無舟楫太子於水濱號令百姓願從者三千餘人因而涉渡而南遇潼關散卒誤以爲賊與之戰士多傷敗收其餘復濟渭而北太子過渭之後渭水之漲隨馬跡而高丈餘追者盡溺衆心大喜以爲聖感帝行至豐寧南見大河天塹之固欲整軍北渡將詣豐寧忽大風飛沙礫數步之間不辨人馬繇是迴軍東趣靈武風沙頓止天地廓清

乾元三年正月甲申元帥奏於河陽陝東大破賊文武百官奉表稱賀曰伏見元帥行營露布伏承官軍大破逆賊二千餘衆兼燒浮橋柵壘等悉皆蕩盡陝東大破兇徒斬及生擒甚衆又見中書門下稱河陽橋頃因河陵衝突連艦偏斜昨一軍吏夜間橋下聞見有神人云我是毗沙門天王爲國家正此橋柱及平明橋忽正又勝州已北百姓數千人忽見兵馬極衆喚百姓索食其中有人云我是張韓公及王忠嗣領此兵馬爲國討賊不日當太平百姓陳祭訖須臾不見此皆聖德所感人神合符靈應昭然今古未有者臣聞聖人者與天地合德日月齊明神祇告休山

川輸貺雖五兵暫阻而七德肇脩伏維乾元大聖先
天文武孝感皇帝陛下眷德昭融文思光被道冲玄
漠德同淵明三靈貢珍百神効職頃者兇徒未殄侵
軼京師東郊不開尚稽大討幽明增憤動植未康固
得天祇護梁神兵啟陣喧聲夜發狀若搆於龜鼉靈
契昭然威德清於蚊蚋三軍盡覩百姓咸觀此實止
戈之先兆也及師出交懷一戈而羣兇塗地兵臨分
陝再戰而餘孽殄殲擒元惡而詰彼兇殘焚賊橋而
斷其歸路莫不覩兵勢以懾竄聞軍聲而畏威撲滅
之期於斯見矣此則天時人事斷在目前睿筭神功

致之度內皆經籍未載古今蔑聞者也詔曰朕爲人
父母時屬艱虞東夏不康近郊多壘除妖撲燎戎馬
交馳父出夫行征徭未息蓬頭汗甲今已累年憂我
人斯寢興誠切達精誠於天地委長策於廟堂宗社
假靈王師克勝殘逆窮搏聚而相持造舟橫河樹柵
憑岸一鼓齊進應時殲蕩陝東連捷吉語驟來平賊
安人指期可待自古王者得神以興城梁不假於人
功士馬或稱於幽贊休徵斯在靈應不違凡百具寮
相同慶慰

敬宗寶曆元年正月乙卯命中使張宗肇持緋衣賜

長安縣主簿鄭翦翦時主役太清宮御院忽於院前西序見一白衣老人云此下有井正直皇帝過路汝速實之不然罪在不測翦隍遽領役人視之其處已陷數尺發之則一古井宛然驚顧之際已失老人所

在翦遂告功德使以聞帝歸至宮宰臣及供奉官於馬舞蹈稱賀時有詔命翰林學士韋處厚紀述以表其異

後唐武皇初爲河東節度使追黃巢至于曹州班師過汴汴帥朱溫迎勞於封禪寺請帝休於府第乃以從官三百人及監軍使陳景思館於上原驛是夜張

樂陳宴席汴帥自佐饗出珍幣侑勸帝酒酣戲諸侍妓與汴帥握手叙破賊事以爲樂汴帥素忌帝乃與其將楊彥洪密謀竊發彥洪於巷陌連車樹柵以扼奔竄之路時從官者皆醉俄而伏兵竊發來攻傳舍武皇方大醉噪聲動地從官十餘人捍賊侍人郭景銖滅燭扶帝以茵幕裹之匿於床下以水洒面徐曰汴帥謀害司空帝方張目而起引弓抗賊有頃煙火四合復大雨震電帝得從者薛鐵山賀回鶻等數人而去兩大如不辨人物隨電光登尉氏門縋城而出得還本營

明宗初爲邢州節度使從莊宗南伐次胡柳陂前軍
 周德威爲輜重所撓一軍不利莊宗以中軍戰勝兩
 軍勝負相半而左馳右趨皆無部伍或號曰晉王渡
 河而北矣日晡晚帝與末帝相失軍無所止河水初
 解以無舟楫帝泣曰吾兒安在吾王安歸身世盡于
 斯矣是夜大寒雪深盈尺兵士凍死者衆河水有復
 合處帝試踐行可渡不旋踵而冰解繼行者陷矣是
 夜帝得渡宿先鋒砦翼日莊宗遣內官訪帝時已獲
 土山之捷矣軍聲復震

晉高祖後唐應順末自河東改鎮嘗山承詔詣關會

少帝失位與數百騎欲奔鄴夜與少帝相遇護嘉東

遂俱入衛郡泊郵舍中時劉諱郎漢高祖也從行是夜偵

知少帝伏甲欲與從臣謀害晉高祖詐屏人對語方

坐於亭廡劉諱密遣御史石敢袖鎚立於後伏甲者

俄起左右驚擾敢素有勇力擁晉高祖入一室以巨

木塞門敢力當其鋒尋死焉劉諱乃解所佩刀隔窓

授晉高祖既出有數卒逐劉諱劉諱時無佩刀遇夜

晦以在地葦炬未燃者奮而擊之人謂其短兵也遂

敗走帝乃匿身長垣下隔垣聞人相告云石太尉已

死矣即晉高祖也劉諱審其語則帝所親驍將李洪信也



劉諱因諄而召之曰石太尉無恙繇是坎垣求出其垣劃然頽落有神助焉劉諱乃與洪信合衆護晉高祖殺建謀者以少主授刺史王引贊晉高祖乃能脫難赴關

漢高祖卽位初自晉赴維次絳郡有司奏置頓厄口鎮帝曰地名稍惡安可宿之朕記此別有好路乃遣人導之果坦夷而至于聞喜縣有從騎蒙駝繇厄口者多爭路墮於絕壑從臣嘆曰昔高皇帝避柏人之名其智若神我帝惡厄口而入聞喜何千載之暗合邪

周太祖初爲漢侍衛馬步軍都指揮使乾祐中圍李守貞于河中府攻城日大風帝祝於河神而風止及守貞將敗帝夢河神告曰勿攻擊七月下旬上帝滅其族果如其言及北征至澶州驛亂軍逼卽登城樓令王峻慰諭之曰河水已解浮橋難立如何南濟衆亦憂之其夜西北風裂凝凍比昧旦津吏報水堅可渡步騎踐冰而行堅如鐵石未午軍人渡絕衆謂之凌橋其日將夕津吏報曰冰橋泮矣
廣順二年五月親征慕容彥超于兗州是月十三日至城下賊尙拒守十七日晝寐夢內養德兒引道士



一人進書卷首云車駕來月二日還京其下文字絕多不能盡記既寤以夢示宰臣又四日而城拔六月二日離兗州是日大雨城下行營水深數尺其日晚至中都縣太祖笑謂侍臣曰今日若不離城下則當為水潦所溺矣

世宗顯德元年三月親征河東大敗賊軍初兩軍之未整也風自東北起不便於王師及與賊軍相遇風勢斗迴人情相悅

册府元龜

册府元龜

淮南李嗣京參閱

西極文翔鳳訂正

豫章黃國琦較釋

帝王部

二十七

孝德

夫德教加于百姓刑于四海者天子之孝也若乃總制區宇尊居宸極至性內發玄化潛運率土之濱民德歸厚矣其或在田處晦祇載之德已隆膺期撫運奉養之誠彌竭至於逮事靡及追懷罔極因心創鉅

時思永感哀動左右風化天下傳曰君子篤於親則民興於仁蓋聖人之教不肅而成不嚴而治繇茲道也

帝舜側微堯聞其聰明將使嗣位乃日浴四岳朕在位七十載汝能庸命異朕位岳曰否德忝帝位日明明揚側陋師錫帝曰有鰥在下日虞舜帝曰俞予聞如何岳曰瞽子父頑母嚚象傲克諧以孝蒸蒸乂不格姦帝日我其試哉女子時觀厥刑于二女釐降二女子媯汭嬪于虞帝日欽哉其後益贊于禹日帝初于歷山往于田日號泣于昊天于父母負罪引慝祇

載見瞽瞍夔夔齋慄瞽瞍亦允若

慝惡載事也夔夔慄懼之貌言舜負

罪引慝敬以事見于父悚懼齋莊父亦信順之言能以至誠感頑父又按史記日舜母死父瞽瞍更娶妻而生象瞽瞍頑母嚚弟象傲嘗欲殺舜舜避逃及有小過則受罪順事父及後母與弟象日以篤謹匪有懈順適不失子道兄弟孝慈欲殺不可得年二十而於是以孝聞三十而帝堯問可用者四嶽咸薦虞舜日可於是堯乃以二女妻舜以觀其內九男與處以觀其外居媯汭內行稱謹堯二女不敢以貴驕事舜親戚甚有婦之道堯九男皆益篤堯乃錫舜絺衣與琴為築倉廩予牛羊瞽瞍尚復欲殺之使舜上塗廩瞽瞍從下縱火焚廩舜乃以兩笠自扞而下得不死後瞽瞍又使舜穿井為匿空旁出舜既入深瞽瞍與象共下土實井舜從匿空旁出去瞽瞍象喜以舜為必死象日本謀者象象與父母分於是日舜妻堯二女與琴象取之牛羊倉廩予父母象乃止舜官居鼓其琴舜往見之象懼不懼日我思君正鬱陶舜日然爾其庶矣舜復事瞽瞍與象彌謹年五十攝行天子事六十一代堯踐帝位載天子旗往朝父瞽瞍夔夔唯謹

如子道封弟象為諸侯又按孟子曰人少則慕父母知好色則慕少艾有妻子則慕妻子仕則慕君不得於君則熱中大孝終身慕父母五十而慕者予於大舜見之矣熱中謂心熱恐懼又中庸篇載舜其大孝也與德為聖人尊為天子富有四海之內宗廟饗之子孫保之劉向新字載昔者舜自耕稼陶漁而躬孝友父瞽瞍頑母嚚及弟象傲皆下惡不移舜盡孝道以供養瞽瞍與象為浚井塗廩之謀欲殺舜舜益篤出田則號泣年五十猶嬰兒慕可謂至孝矣故耕於歷山歷山之耕者讓畔陶于河濱而陶者器不苦窳漁於雷澤雷澤之漁者均分及立為天子化蠻夷率服北發渠搜南撫交趾莫不慕義麟鳳在郊故孔子曰孝悌之至道通于神明光于四海舜之謂也

商高宗宅憂亮陰三祀

陰默也居憂信默三年不言又按論語曰高宗諒陰三年

不言

周文王之為世子朝於王季三皆日期雞初鳴

以其禮同

而衣服至於寢門外問內豎之御者曰今日安否何

如命者御如今小使直日矣

內豎曰安文王乃喜

孝子當及日中又至亦如之及莫夜又至亦如之

也其有不安節則內豎以告文王文王色憂行不能

正履節謂居處故王季復膳飲食安也然後亦復初解食

上必在視寒煖之節在察食下問所膳問所食者命膳宰

曰未有原應曰諾然後退未猶無也原再也勿有所再進為其失飪臭味惡也

退反其寢武王初為太子文王有疾武王不脫冠帶而養言嘗在側

文王一飯亦一飯文王再飯亦再欲知氣力旬有二

箴藥所勝

卅帝元龜 帝王部 卷之二十七 三

日乃間

問乃瘳也禮記中庸篇曰子曰武王周公其達孝矣乎夫孝者善繼人之志善述人之事

也者

漢高祖居長安太上皇思欲歸豐高祖乃更築城寺市里如豐縣號曰新豐乃徙民以充實之

文帝居代時薄太后嘗病三年帝不交睫解衣湯藥非口所嘗弗進

後漢明帝永平七年皇太后陰氏喪帝性孝愛追慕無已十七年正月當謁原陵夜夢先帝太后如平生歡既寤悲不能寐即案曆明日吉遂率百官及故客上陵其日降甘露於陵樹帝令百官采取以薦會

畢帝從席前伏御牀視太后鏡奩中物感動悲涕令易脂澤裝具左右皆泣莫能仰視焉

章帝母賈貴人明帝為太子以選入官生帝而明德馬太后無子明帝命太后養之謂曰人未必當生子但患愛養不至耳后於是盡心撫育勞悴過於所生章帝亦孝性淳篤恩性天至母子慈愛始終無纖芥之間建初三年帝饗士于南宮因從太后周行掖庭池閣乃閱陰太后舊時器服愴然動容乃命留五時衣各一襲及帝所御衣合五十篋餘悉分布諸王主及子孫在京師者各有差特賜東平王蒼及瑯琊王

京書曰中大夫奉使親聞動靜喜之何已歲月驚過山陵寢遠孤心悽愴如何如何間饗衛士於南宮因閱視舊時衣物聞於師曰其物存其人亡不言哀而哀自至信矣惟王孝友之德亦豈不然今送光烈皇后假紵帛巾各一級衣一篋可時奉瞻以慰凱風寒泉之思又欲令後生子孫得見先后衣服之製今魯國孔氏尚有仲尼車輿冠履明德盛者光靈遠也其光武皇帝噐服中元二年已賦諸國不敢復送

魏明帝追尊母文昭甄后初營宗廟掘地得玉璽方一寸九分其文曰天子羨思慈親明帝爲之改容以太牢告廟又嘗夢見后於是差次舅氏親疎高下叙用各有差

晉景帝居母宣穆張皇后喪以孝聞

武帝泰始二年八月詔曰此上旬先帝棄天下日也便已周年吾煢煢當復何時一得敘人子之情邪思慕煩毒欲詣陵瞻視以盡哀憤主者俱行備太牢安平王孚尚書令裴秀尚書僕射武陔等奏陛下至孝蒸蒸哀思罔極衰麻雖除哀毀蔬食有損神和秋節尚有餘暑謁建山陵悲感摧傷群下竊用疎息以爲宜降抑聖情以慰萬國詔曰孤煢忽爾日月已周痛

慕摧感永無逮及欲奉瞻山陵以敘哀憤體氣自佳耳又已涼便當行不得如所奏也王者便具行備又詔曰漢文不使天下盡哀亦帝王至謙之志當見山陵何心而無服其禮以衰經行秀等重奏曰臣聞上古喪期無數後世乃有年月之漸漢文帝隨時之義制為短喪傳之於後陛下社稷宗廟之重萬方億兆之故既從權制除衰麻羣臣百姓吉服今者謁陵以敘哀慕若加衰經進退無當不敢奉詔詔曰亦知不在此麻布耳然人子情思為欲令哀喪之物在身蓋近情也羣臣自當按舊制秀等又奏曰臣聞聖人制

作必從時宜故五帝殊樂三王異禮此古今所以不同質文所以迭用也陛下隨時之宜既降心克已俯就權制已除衰麻而行心喪之禮今復制服義無所依若君服而臣不服亦未之敢安也叅議宜如前奏詔曰患情不能跂及耳衣服何在諸君勤勤之至豈苟相達四年帝母文明王皇后喪合葬崇陽陵將遷祔帝手疏后德行命史官為哀策初居文帝喪帝雖從漢魏之制既葬除服而深衣素冠陰席撤膳哀敬如喪者有司奏改服進膳不許遂禮終而後復吉

皇太子

后喪有司奏前代故事倚廬中施白縑帳蓐素牀布裹巾句草鞋輦板輿細犢車皆施縑衰詔不聽但令

以布車而已其餘居喪之制亦如禮文有司又奏大
行皇太后當以四月二十五日安厝故事虞著哀服
既虞而除其內外官寮皆就朝晡臨位御除服訖各
還所次除哀服詔曰夫三年之喪天下之達禮也受
終身之愛而數年之服奈何葬而便即吉情所不忍
也有司又奏世有險易道有汗隆所遇之時誠有繇
然非禮也方今戎馬未散王事至殷更須聽斷以熙
庶績昔周康王始登翊室猶戴冕臨朝降于漢魏既
除葬釋諒闇之禮曰遠代而廢矣惟陛下割高宗之
制從當時之宜敢固以請詔曰攬省奏事益增感劇
夫三年之喪所以盡情致禮葬已便除情所不堪豈
當然耳且今思存草土卒嘗以吉奪之乃所以重傷
至心非見念也每代禮典質文皆不同此身何為限
以近制使達喪闕然乎羣臣又固請帝流涕久之乃
許文帝崇陽陵先開一日遣侍梓官又遣將軍校尉
嘗並尉中監各一人將殿中將軍以下及帝時左右
嘗給使詣
陵宿衛

明帝性至孝太寧元年二月葬元帝於建平陵帝徒

跣至陵所

康帝即位咸康八年七月丙辰葬成帝於興平陵帝
親奉奠於西陛既發引徒行至閭闔門外素輿至于
陵所

建元元年四月有司奏成帝山陵已一周請改素服
御進膳如舊壬寅詔曰禮之隆殺因時而寢興誠無
嘗矣至於君親相準名教之重莫之改也權制之作
蓋出近代雖曰適事實弊薄之始先王崇之後世猶
怠而况因循又從輕降義弗可矣

簡文帝為琅琊王年七歲鄭夫人薨帝號慕泣血固



請服重元帝哀而許之

孝武帝將以散騎嘗侍領著作郎吳隱之為黃門郎以隱之貌類簡文帝乃止

後魏明元道武長子也初封齊王帝母劉貴人賜死道武告帝曰吾遠同漢武為長久之計帝素純孝哀泣不能自勝道武怒之帝還宮哀亦不自止日夜號泣道武知而又召之帝欲入左右曰孝子事父小杖則受大杖避之今陛下怒盛入或不測陷帝於不義不如且出待怒解而進不晚也帝懼從之
大武明元長子帝生不遠母密太后及有識言則悲

慟哀感傍人明元聞而喜及明元不豫衣不解帶孝文幼有至性年四歲獻文曾患癰帝親吮膿五歲受禪悲泣不能自勝獻文問之帝曰代親之感內切於心獻文甚嘆異之及居祖母文明太皇太后喪勺飲不入口五日毀墓過禮五日不食中部曹楊椿進諫曰陛下至性孝過有虞居哀五朝水漿不御羣下惶灼莫知所言陛下荷祖宗之業臨萬國之重豈可同匹夫之至節以取僵仆且聖人之禮毀不滅性縱陛下欲自賢於萬代其若宗廟何帝感其言乃進粥已過朞月毀瘠猶甚司空穆亮表曰王者居極至尊



至重父天母地懷柔百靈是以古先哲王制禮成務
施政立治必順天而後動宣憲垂範必依典而後行
用能四時不忒陰陽和暢若有過舉咎徵必集故大
舜至慕事在納麓之前孔子至聖喪無過瘠之紀堯
書稽古之美不錄在服之痛禮備諸侯之喪而無天
子之式雖有上達之言未見居喪之典然則位重者
爲世以屈已居聖者達命以忘情伏惟陛下至德參
二儀惠澤覃河海宣禮明刑動遵古式以奉孝之痛
服期年之喪練事既闋號慕如始統皇極之尊同衆
庶之制廢越紼之大敬聞宗紀之舊軌誠繇文明太

皇太后聖畧超古惠訓深至欲報之德昊天罔極比
之前代戚爲過甚豈所謂順帝之則約躬隨衆者也
陛下旣爲天地所子又爲萬民父母子過哀父則爲
慘悴父過戚子則爲憂傷近蒙接見咫尺旋冕聖容
哀毀駭感群心書稱一人有慶兆民賴之一人過哀
黎元焉繫群官所以顛殞震懼率土所以危惶悚慄
百姓何仰而不憂嘉禾何由而播植願陛下上承金
冊遺訓下稱億兆之心時襲輕服數御嘗膳脩崇郊
祠垂惠咸秩輿駕時動以釋憂煩博採廣諮以尊性
氣息無益之戀行利見之德則休徵可致嘉應必臻

禮教必宣孝慈兼備普天蒙賴含生幸甚詔曰苟孝
悌之至無所不通今飄風亢旱時雨不降寔繇誠慕
未濃幽顯無感也所言過哀之咎諒爲未衷省啓以
增悲愧及再周忌日哭於陵前絕膳二日哭不輟聲
先是太后葬於永固陵中反虞於鑿玄殿詔曰遵旨
從儉不申罔極之痛稱情允禮又損儉訓之德進退
思惟信用摧感又山陵之節亦有成命內則方丈外
裁掩坎脫於孝子之心有所不盡者室中可二丈墳
不得過三十餘步今以山陵萬世所仰復廣爲六十
步孤負遺旨益以痛絕其幽房大小棺槨質約不設

盟器至于素帳幔茵瓷瓦之物亦皆不置此則遵先
志從冊令奉遺事而有從有違未達者或以致怪梓
宮之裏玄堂之內聖靈所止是以一一奉遵仰昭儉
德其餘外事有所不從以盡痛慕之情其宣示遠近
著告羣司上明儉誨之德下彰違命之失及卒哭孝
文服緣近臣從服三品以下外臣衰服者變服就練
七品以下盡除卽吉設祔祭於太后殿公卿以下始
親公事帝毀瘠絕酒肉不御者三年初帝孝於太后
乃於永固陵東北里餘營壽宮遂有終焉瞻望之志
及遷雒陽乃自表瀍西以爲山園之所而方山虛宮

號曰萬年堂云

太和十六年九月辛未帝哭文明太后於陵左終日不絕聲幕越席為次

侍臣侍哭壬申帝以忌日哭於陵左哀至則哭侍哭如昨帝二日不御膳癸酉朝中夕三時哭拜於陵前

夜宿鑿玄殿是夜撤次甲戌帝拜哭辭陵還永樂宮

前廢帝諱恭字脩業廣陵惠王羽之子少端謹有志

度事祖母嫡母以孝聞

後周武帝建德三年三月帝居皇太后此奴氏喪處

倚廬朝夕共一溢米羣臣表請累旬乃止詔皇太子

贊總澄庶政五月庚申葬文宣皇后於永固陵帝祖

既至陵所辛酉詔曰齊斬之情經籍彛訓近代沿革

遂亡斯禮伏奉遺令既葬便除攀慕几筵情實未忍

三年之喪達於天子古今無易之道王者之所嘗行

但時有未諧不得全制軍國務重須自聽朝縗麻之

節苦廬之禮率遵前典以申罔極百寮以下宜依遺

令公卿上表固請俯就權制過葬即吉帝不許引古

禮答之群臣乃止於是遂申三年之制五服內亦令

依禮

隋高祖初仕後周為大將軍遇皇妣寢疾三年晝夜

不離左右代稱純孝開皇十七年九月謂侍臣曰禮

主於敬皆當盡心忝稷非馨貴在祇肅廟廷設樂本

以迎神齋祭之日觸目多感當此之際何可為心在

路奏樂禮未爲允群公卿士宜更詳之遂下詔自今已後享廟日不須備鼓吹殿廷勿設樂懸仁壽二年詔曰哀哀父母生我劬勞欲報之德昊天罔極但風樹不靜嚴敬莫追霜露旣降感思空切六月十三日是朕生日宜令海內爲武元皇帝元明皇后斷屠唐高祖武德八年七月群臣食於御前果有蒲桃侍中陳叔達執而不食帝問其故對曰臣母患口乾不能治欲歸以遺母帝曰卿有母可遺乎遂流涕嗚咽久之乃止賜物百段帝性至孝初葬元貞太后時遇祁寒跣行二十餘里足皆流血毀頓之極哀感行

路言及二親未嘗不流涕有得時珍及諸方異膳必先薦享而已方食太宗貞觀二年八月帝以軍國無事每日視膳於西宮三年正月戊午帝有事於太廟至太穆皇后神王悲慟嗚咽伏地不能興侍衛者莫不獻欵先是帝在髻亂穆后於諸子之中獨所鍾愛自穆后寢疾朝夕侍側不解衣冠所進湯藥必先嘗之及丁穆皇后憂毀瘠三年杖而能起卽位後幸隴州經慶善宮欵欵謂侍臣曰此朕生處朕之胞見在宮裏慈顏緬邈無可復追生育之恩不知何以上報因舉聲號慟悲不

自勝在位者莫不嗚咽及還至宮享后於正寢後數歲下詔為后建福佛寺於京師初起作之夜帝夢見后侍奉若平生既寤悲感流涕達旦因下詔為后於寺盡京城僧尼設齋追福焉

四年六月高祖不豫帝廢朝視藥膳於大安宮如家人之禮辛卯有瘳百寮稱慶詔曰書不云乎一人有慶兆民賴之朕虔奉大安愛敬崇極日嚴之養祇慄斯在近日聖躬遺豫寢膳有虧憂懼有懷不遑寧處博求醫術備盡蠲療祈告明靈具陳懇篤上玄降福遂蒙昭祐應於康愈萬福咸宜慶幸之隆實兼家國

思班愷樂洽于卿士然而尚齒興孝德教所先饗餼是加義超嘗等諸州都督刺史及文武官老人八十以上并孝旌表門閭者並宜節級賜物以申饗宴庶使萬國之內同此歡心施於四海皆知朕意八年三月高祖讌於兩儀殿顧長孫無忌曰當今蠻夷率服古未嘗有無忌對曰陛下以神武定天下什屬得人萬國乂安四夷賓服臣實不勝幸甚謹上千秋萬歲壽高祖大悅以酒賜帝帝奉觴上壽流涕而言曰百姓獲安四夷咸服皆奉遵聖旨豈臣之力也於是帝與文德皇后互進御膳并上服御衣物皆珍寶奇異

又上珍寶巾予皇后執櫛理鬢手自冠焉因言至尊
年高髮白都盡帝與皇后皆流涕蒸蒸就養一同家
人常禮高祖亦喜形於色群臣瞻奉莫不內懷感悅
十三年正月帝朝於獻陵至小次降輿號哭入闕門
西向再拜慟絕不能興禮畢改服入于寢射親執饌
閱高祖及先后服御之物匍匐牀前悲慟左右侍御
者莫不歔歔 會要又載初甲辰之夜大雨雪及帝入
陵之上俄而流布天地晦冥禮畢帝出自寢宮步過
司馬門泥行二百餘步於是風靜雪止天色開霽咸
以為孝感之所致焉

十四年五月丁酉帝追感高祖先后同忌此月不御

酒肉

十六年十二月令左監門中郎將齊士員將兵衛獻
陵帝召士員至望見而降殿自悲咽不已謂從官曰
頃屬歲陰道暮情深罔極所備新衣珍饌欲以正旦
奉薦園陵朕若親行便勞扈從三元告始家有吉凶
慶慰之禮咸重茲日朕不欲勞人乃自抑止因命江
夏王道宗代行所獻之物帝並跪授道宗焉
十七年七月癸巳司空房玄齡給事中許敬宗著作
佐郎敬播上所撰高祖并當朝實錄各二十卷帝遣
諫議大夫褚遂良讀之於前始讀至帝初生祥瑞遂



感動流涕曰朕於今日富有四海追思膝下不可復
休因悲不息命令收卷

二十年十二月癸未帝謂司徒長孫無忌等曰今日
吾之生日俗云生日可嘉樂於吾之情翻成感思君
臨天下富有四海而追求侍養永不可得仲由懷負
米之恨則吾情也因泣下數行群臣並皆掩淚

高宗爲晉王始年九歲居長孫皇后喪哀慕不能自
勝太宗嘗加慰撫繇是特深寵異貞觀十六年立爲
皇太子十九年太宗親征遼左命太子於定州監國
將發太子悲啼數日因奏請飛驛遍表起居又請遍

勅垂報並許之飛表奏事自茲始也每聞太宗親臨
賊城不踰百步中宵不寐達旦銜涕因上表曰願收
雷霆之威駐矢石之外惴惴愚誠敢以死請及師旋
太子從至并州時太宗患癰太子親吮之扶輦步從
者數日旣至京師太宗氣疾發動乃於北闕餌藥令
太子總攝機務每日聽政於東宮罷朝復謁寢門視
膳不離左右

二十三年從幸翠微宮太宗苦痢增劇太子侍疾旬
日之間髮有變白者太宗泣曰吾聞古之孝者不過
文王汝今數日不食晝夜不離吾側口嘗湯藥盛年

鬢則變白汝之孝敬過文王矣吾雖殞沒亦無所恨及太宗靈駕將引帝號叫自投於地板輶車哽慟摧裂大軍悲哭不能自勝

永徽二年四月己丑以將忌月令有司進素食太嘗停教終于五月自三年喪畢朔望未御正殿百寮上表請乞九月辛卯始御太極殿自此每五日一度太極殿視事十一月辛酉親祀南郊黃門侍郎宇文節奏言依儀明日朝群臣陳樂懸請奏九部樂帝曰被甲而舞者情不忍觀所司更不宜設言畢慘愴久之初太宗在藩樂工爲秦王破陣樂舞以歌用兵之妙

貞觀初以爲武舞每讌享奏樂必陳之至是停於殿廷所作而所司依前習之三年正月丙子親祠太廟及布幣裸獻至太宗神座俯伏感慟悲不自勝侍衛者皆獻歔莫能仰視

六年春正月壬申朔親謁昭陵文武百寮及宗室子孫並陪位帝降輦易服行哭就位再拜擗躡禮畢又改服奉謁寢宮其崇聖宮妃嬪太長公主以下及越趙二國太妃等先於神位左右侍列如平生帝入寢哭踴絕於地進至東階西面再拜號慟久之乃進太牢之饌加珍饈具品引太尉無忌司空勣越王福曹

王明左屯衛大將軍陳知節並入執爵進俎帝至神座前拜哭奠饌闕先帝先后衣服拜辭訖行哭出寢北門乃御小輦還行宮

中宗為皇太子大定元年從則天幸京師時屬凝寒親捧天后足步從一里餘天后大悅下制褒美宣付史官二年正月欲躬侍則天皇后靈駕以赴山陵百官固諫乃止有司以則天皇后服滿三十六日請帝及百寮並從權制改服慘服帝不許竟服衰麻唯公卿以下聽服慘服帝自居諒闇令所司唯進倉米薄粥豆盧欽望以帝素有氣疾請少加一薑桂上表曰

臣聞孝子居喪朝一溢米暮一溢米食之無筭或粥或飯不能食粥者飯羹以菜可也又曰五十不致毀又曰喪有疾食肉飲酒加以薑桂又曰若不勝喪乃比於不慈不孝孝經曰毀不滅性此聖人之教也竊以兩溢之米欲滿大升或為飯粥隨性所嗜羹以助食年至五十不合致毀素有疾又加酒肉食味不美調以薑桂此乃聖人制禮原父母之情不欲令孝子病毀不勝哀痛也自古聖人制禮如此殷勤大行則天遺制如此墜至今陛下三日視事聽覽萬機群臣性命仰陛下存活三聖基業待陛下興隆伏惟聖年

已登五十陛下緣在房州先患脚氣今在衰苦舊患更發又自今月二日已來唯令進倉米薄粥臣下驚恐不勝惶懼但倉米陳臭天下共知食即動氣奈何陛下以五十之年抱積久之患奉累聖之緒承遺制之托上事宗廟社稷下養赤子蒼生故食動病之倉米不遵遺令之教訓陛下縱自輕性命其奈七廟何其奈萬姓何臣等痛切之至謹述先聖制禮大行遺制伏乞少進美膳加以薑桂即望聖體稍和舊患漸損制不許

玄宗開元五年十二月己丑勅令在邊密又逼忌辰起今日後至來年正月上旬以來竝進蔬食所司准式此限內仍令都城禁屠殺

十七年十一月謁橋陵帝望陵涕泣哀感左右升奉先縣爲赤縣以所管萬三百戶供奉陵寢

肅宗至德二年十二月丙午玄宗自蜀至帝至望玄宮奉迎玄宗御宮南樓以俟之帝望樓辟易下馬趨進樓前再拜蹈舞稱賀玄宗下樓帝匍匐捧玄宗足涕泗嗚咽不能自勝扶玄宗升殿尚食每進一味帝皆嘗膳然後進飛龍御馬帝親選試然後進御玄宗上馬秉轡帝攏馬行數步玄宗止之而後退玄宗謂

左右曰吾享國以來未知貴也今見吾子爲天子乃知貴也左右皆呼萬歲帝嘗避馳道執鞭弭導引玄宗自開遠門至丹鳳門連棚夾道兵馬旗幟昭曜都邑者老繙黃垂泣蹈舞皆曰不圖今日天下再安復覩二聖都人士女觀者萬億計繇丹鳳門入大明宮内外文武百寮先俟於含元殿前以班序立玄宗御殿扇開左相苗晉卿右僕射裴冕等奉賀蹈舞呼萬歲玄宗親慰百寮皆感咽帝累奏請辭位居東宮玄宗固不許又使高力士再三諭旨乃奉詔焉乾元元年四月戊辰帝進太上皇燒丹竈詔曰孝感之極通

於神明傳於前史跡罕彰灼今日之事不其效歟吾比年服藥物比爲金竈煮煉石英自經寇戎失其器用前日晚際思欲脩營一昨早朝遽聞進奉有同符契若合神明此乃汝之因心測吾之本意豈惟此度前後非一則知惟睿作聖惟德動天再闢寰區重會父子付托之際古今未聞色養之勤書冊不載寤寐嘉歎深慰于懷宜頒示天下宣付史館帝上表謝曰臣伏奉恩命以臣所進藥器深合天心伏蒙特垂褒美令頒示天下臣幸以菲才叨膺寶曆聖慈曲眷每事憂兢至於孝養之宜臣子嘗禮先意承旨務達微誠

不期進奉之時偶合聖旨寧謂至誠能感事近前知以臣孝既繇衷物自冥應特加獎飾許載縑緗在臣下情彌增愧悚誥曰王者域中之尊孝者天下之本兼而成務厚莫重焉而應物以和奉親以愛繇衷而舉有感必通若不動於神明豈能比於符契且匹夫之績尚銘於鼎彝况天子之孝不列於縑緗故欲昭宣示於中外垂芳於來葉光我國典也十一月玄宗幸華清宮還帝至灞上迎候下馬趨進百餘步再拜舞蹈前抱玄宗足玄宗撫帝背帝又控轡行數十步有命乃止

上元元年七月殿中監李輔國矯詔自興慶宮移太上皇於大內帝更選擇後宮及上皇素所愛幸并妓樂百餘人令於西宮備灑掃又有詔令萬安咸宜二長主侍養上皇至於服御饌食窮以珍奇視膳問安加於嘗日異方進獻先到西宮國之大事咨之可否然帝從此怏怏或病嘗涕泣不樂每西宮朝見嗚咽不能自勝侍臣感動天下稱孝繇此嘗欲誅輔國會疾甚竟不行

憲宗元和二年春正月庚寅朝享於太廟初次諸室帝皆盡于誠敬至德宗順宗室流涕嗚咽若不自勝

侍臣及舉册官皆相顧感泣

穆宗長慶元年正月庚子享太廟至順宗憲宗二室
獻欬流涕侍臣從官皆感動

文宗孝義天然太和中太皇太后居興慶宮寶曆太

后居義安殿皇太后居大内

太后憲宗懿安郭后也
寶曆太后穆宗恭禧王

后皇太后穆宗真獻蕭后也
王后生敬宗蕭后生文宗

時號三宮三太后帝五

日參拜四節獻賀皆繇複道至南内開成中正月望

夜帝於咸泰殿陳銀燭奏仙韶樂三宮太后俱集奉

觴獻壽如家人禮諸親王公主附馬戚屬皆侍宴凡

膳饗珍果蠻夷奇貢獻郊廟之後奉三宮而後進御

帝嘗以宗廟祭器朽故不修丁寧言於宰臣因令郡

縣有為漆器處精造以進既而江南諸道有以新祭

器奏到有司遽將呈貢上斂容令陳於別殿具冠而

闕之有頃獻欬而退

後唐莊宗初嗣晉王居喪過制毀瘠不自勝將吏不

得謂見監軍使張承業排闥至廬所言曰大孝在不

墜家業不同匹夫之孝且君父猷世嗣主未立竊慮

兇猾不逞之徒有懷覬望又汴寇壓境利我凶哀苟

或搖動則倍張賊勢訛言不息懼有變生請依顧命

墨纒聽政然後經畧南征保家安親此為大孝勿拘

嘗制以收遠圖於是聽斷大事乃平定趙魏雖萬事之殷在鄴城每一歲之內馳駕歸寧太后者數四士民服其仁孝同光二年正月甲寅帝在維京太嘗奏定皇太后到闕儀皇帝合於銀臺門內奉迎勅頃以未平國耻須運戎機十年親統於驍雄千里久違於定省寧辭櫛沐嘗切晨昏今已翦蕩元兇宅居中土仰稟庭闈之訓獲寧宇宙之心恨不得躬詣汾川攀迎法駕况皇太后遠涉山阻將及近畿朕何以端坐闕庭爲拘嘗禮雖云舊制未叶斯懷朕今親至懷州奉迎丙辰中書奏緣自二十三日後在散齋之內不


合遠出勅旨到河陽奉迎庚申幸河陽奉迎皇太后悲泣久之太后素與劉太妃善分決之後思心鬱陶雖娛玩充庭常悒然不樂俄聞太妃違豫日命尚醫中使問訊結轍使言有瘳卽喜言加則不御飲膳自是終始無敢言加者旣而謂帝曰吾與太妃恩如伯仲彼經年抱病但見吾面差足慰心吾驟歸晉陽旬朔與太妃復來帝曰時方暑毒山路崎嶇無煩徃復且可令存渥輩迎侍太妃譬諫久之方止及凶問至太后慟哭累旬自是漸不豫帝朝夕嘗藥視膳后妃衣不解帶請禱山川竟不效帝居喪哀毀殆至滅性

皇族伏苦諫譬五日方食

閔帝即位初御中興殿群臣列位馮道升階進酒帝曰比於此物無愛除賓友之會不近樽竿况在沉痛之中安事飲啖命徹之

周世宗初鎮鄆州太祖親征慕容彥超六月兖州平帝遣使奉表請車駕繇鄆濮路還京庶得一觀天顏太祖從之及太祖過澶淵帝迎謁於馬前悲咽流涕顯德元年帝親征河東迎故淑妃喪還太祖一后三妃及嵩陵就掩皆議陪祔帝以妃喪在賊境未及遷窆乃詔有司於嵩陵之側預營一塚以虛之俟賊平

即議襄事至是帝幸晉郊果成素志蓋孝感之所致也



冊府元龜

冊府元龜 帝王部 卷之二十一

孝徳

孝徳

孝徳

